



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 3

**Magda Linette-i round tanabubana nung Iga Swiatek tsükdaktsü**

**Iran indang IRGC odongtar Ali Naini tepsetogo**



VOL. XXIII ISSUE NO. 157 (ADOK 157) DIMAPUR KÜPTOKNÜ (SATURDAY) METSÜREMI (MARCH) 21, 2026 ₹ 5.00

## Governor Yadav-i H&FW Dept den senden amen

**Dimapur, March 20, 2026 (TYO):** Nagaland Governor Nand Kishore Yadav-i Department of Health & Family Welfare ketdangsurtem den senden ka menogo.

March 20, 2026 nü Naga Bhavan Conference Hall, Lok Bhavan, Kohima nung senden amen aser Secretary, Health & Family Welfare, S. Tainiu-i anir ketdangsurtem aden.

Senden nung H&FW Department-i PowerPoint presentation ajanga Nagaland nung socio-demographic profile, health infrastructure, aser key health sector nung inyaktetbatem lemsatetap.

Nagaland nung major health indicators tajungba kümdar. Kümtem süia arudang Infant Mortality Rate (IMR) kanga ajemogo aser Maternal Mortality Ratio (MMR) o Total Fertility

Rate (TFR) kanga junga kümdar aser iba ajanga maternal o child healthcare services junga inyakba sayur ta department-i ashi.

Parnokisa Governor Yadav dang National TB Elimination Programme (NTEP) kübok mapa tajung inyaka aruba lemsatetap.

Iba maparen nung mapang shitak nung sNi-Kshay Poshan Yojana agütsütsü aser patient adoption nung temulung agütsütsü nungdaker ta health ketdangsurtemi ashi.

Department-i healthcare delivery tashi aitba aser key health indicators tajungba kümdaktsüba atema tenüngsang agütsür ta Governor Yadav-i ashi.

Paisa health programmes jungjunga inyaktü aser ibaji talisa meta talang pilar alidak aser yimtsüngtem nung inyaktü ajungshi.

## East Dimapur Town nung jana endokdak meshir

**Dimapur, March 20, 2026 (TYO):** East Dimapur Town Public Organisation aser East Dimapur Town Council külem nensem ka menogo aser idangji sanitation services anentsüba indang onük benoka lemsatetap.

Iba senden ya March 19, 2026 nü East Dimapur Town Council Office Conference Hall nung amen,

East Dimapur Town atema designated dumping site ka mali anungji tanga lenmang kecha melii April 1, 2026 nungi sanitation services anenba ajanga public nem timtem agütsütsü aser lipoküm asoshi timtem bentsür arutsü ta

senden nung jembitep.

Iba atema EDTPO-i bangdak department dang tekaratiba nung East Dimapur Town Council atema dumping site ka agütsütsü ayongzükogo.

Iba tebilemtü asoshi mapa meinyakra East Dimapur Town nung alirtemi lenmang nung jana endoktsüsa akümtsü aser iba ajanga temang anema alibaren aser sanitation asoshi timtem bentsür arutsü akok ta parnokisa ashi.

Külen, East Dimapur Town Council-ia April 1, 2026 nungi public-i jana endokba anepalu masütsü metetdaktsüogo.

## Chungtia nung curfew ozüng agütsür

**Dimapur, March 20, 2026 (Agencies):** Mokokchung Deputy Commissioner aser District Magistrate Ajit Kumar Verma, IAS-i Chungtia yimtsüng telongtet nung curfew alitsü ozüng agütsüogo.

Chungtia yimtsüng nung tensa mejungi akümtsü akok ta bilema Bharatiya Nagarik Suraksha Sanhita (BNSS), 2023 nung Section 163 kübok iba ozüng agütsüogo.

28-Koridang Assembly Constituency nung by-election atema iba curfew agütsür aser meimchir taküm mesüra kiojen kümzüka ayutsü mechi nung lir.

Mokokchung District Magistrate-i curfew agütsüba nung nisung pungu mesüra talila madenshitsu dena lir aser iba tenokdangba ya aonung 6:00 ako nungi anepdang 5:00 ako tashi lir.

Ajisüaka, iba tenokdangba kübok police, armed forces,

security personnel on duty, official mapa inyakba magistrates & government ketdangsurtem, medical personnel, ambulances, & other emergency services aser emergency mesüra essential services inyakertem madentsü.

Osang angazükba agi March 19 aonung tesü Chungtia yimtsüng nung candidate ana pusemertem tsüngda mepetmesü adoka raratep aser iba tatalokba nung nisung kar pua lir.

Brihostibar aonung 10 aser 11 meta by-election nung toktepnüa bilema candidate ana pusemertem tsüngda mepetmesü adok. Ajisüaka, iba yimtsüng nung mapa lemezükja aliba Indian Reserve Battalion (IRB) sepaitemi tensaji azüok aser nisung 14 apu ta osang ajanga ashi.

Iba tatalokba nung ajemdaker Mokokchung District Magistrate Ajit Kumar Verma, IAS-i curfew alitsü ozüng agütsüogo.

## 40 buba NSF Martyrs' Day mungogo



**Kohima, March 20, 2026 (TYO):** Naga Students' Federation (NSF)-i Hokolbarnü NSF Martyrs' Park nung 40 buba NSF Martyrs' Day mungogo.

Iba sentong nung asür Kekuojalie Sachu aser asür Vikhozo Yhoshu na nem tetushi agütsüogo. NSF-i kümshia March 20 nü kaketshir ana bilemteta aser tetushi agüja Martyrs' Day amunger.

Kohima nung timi lungkak aitdang kaketshir ana ya khaset. Iba tatalokba ya Disturbed Area atsülangba aser Nagaland nung Indian Police Service (IPS) cadre benokba dak sendaka lir.

Item inyakyim ajanga Nagaland policing system nung lisopur temetentem aser shilem amokbanga ayutsü ta Naga civil

society talisa kaketshir teloktemi bilema liasü.

Iba anema lungdak aitdang sepaitemi injang khaloktsü aser student volunteer ana- Kekuojalie Sachu o Vikhozo Yhoshu na khaset aser aika yiru.

Tanü sentong nung menden NSF Speaker Marikho O Lerina-i o jembidang lanur anati taküm bendanga agütsüba ajanga Naga nung maneni ajungmesor ta ashi.

"Iba anogo ajanga külem kaketshir ana taküm samar küm 40 buba abensar aser iba anogomung ajanga asenoki asen lima meimtsü, temeten bushitsü aser telongjem atema noktaksü maneni ajungmesor" ta ASU president Diezevisie Nakhro-ia ashi.

NSF-i NSF Martyrs' Memorial Trophy tour amala

sentongtem ajanga Naga tesemtem nung yimjung aser ka akümtsü asoshi mapa tajungba inyakba atema tenüngsang agütsür ta pai ashi.

"Kaketshir anati taküm bendanga agütsüba ajanga asen tarutsü putu len anir. Küm 40 süiaka tenatu yutsüba senmang ajanga Naga nung ajungmesor. Naga lanurtemi yimjung, telongjem aser akhüm asoshi maneni inyaktü ayongzüküer" ta NSF president Mteisuding-i ashi.

Iba sentong nung minute ka ola madoki tasür nem tetushi agütsü aser NSF, ASU aser tasür kinungertemi naru yutsü.

Sentong nung Chakhesang Baptist Church Pastor Dr. Chikhungo Puro-i temoatsü meshia sarasadem.

## ANSTA-i 'No work, no pay' policy anena atatsü ayongzüküer

**Dimapur, March 20, 2026 (TYO):** All Nagaland School Teachers' Association (ANSTA)-i School Education department dang Teacher Attendance Monitoring System (TAMS) dak sendakba 'No work, no pay' policy agientsü ayongzükogo.

ANSTA-i Directorate of School Education nung Principal Director dangi züluba shidi ka nung device mapa meinyakba, application errors aser network connectivity majungba ajanga biometric-based attendance system nung timtem agütsüogo aser mapai oaka tesayurtem

absent ya züluka lir ta shia lir.

Iba amala data nung dang ajemdaker itasen katizükba ya tim masü aser temeten anema lir, kechiyong mapa inyakertem kuli mebushii mesüra angadangtsü maongka magütsüi temerenshi magütsütsüla ta ANSTA-i ashi.

TAMS ya jungjunga mamshitet tashi itasen katizükba anentsüla aser application o biometric devices indang technical audit asütsüla. Department-isa manual attendance registers ayutsüla aser ibaji school ketdangpurtemi kuli

agütsütsüla ta ANSTA-isa metetdaktsüogo.

Parnokisa department dang cadre review mapang agütsüba onük agizüktsü ayongzükogo. Iba nung senior graduate teachers (GTs) aser primary teachers (PTs) promotion anguba sülen government middle schools (GMS) aser government primary schools (GPS) nung mapa lemezüktsütsü shia lir.

Bushisüngdang aser kuli mebushi tashi tesayur shinga dak service action magütsüla mesüra onoki legal remedies bushitsü ta ANSTA-isa ashi.

## ANPSA Mokokchung Unit tenteter küm 25 ajungba benjong among

**Mokokchung, 20th March (TYO):** All Nagaland Private Schools' Association Mokokchung Unit tenzüker küm 25 ajungba Jubilee sentong "Towards Education Excellence - A Legacy Of Learning" omen dak rangloker 20th March nü Hotel Whispering Winds, Mokokchung nung meraketa mungogo.

Sentong nung tetushi tesemdang aser onük jembir Northfield School Kohima Managing Director & Senior Advisor, ANPSA central Kohima, Pheluopfhelie Kesiezie-i jembidang, tesayur tamajungi tejembi dang jembir, tesayur

tajungi rateta ashir saka tesayur tajungtiba mapa agi sayur aser ajungshir, ta metetdaktsü.

Paisa ashiba agi, tanü Nagaland nung tebilemtü tulutiba kaji lanurtem zünger mapa manguba ya asütsü, lanur meyirijang aika zünger mapa mangu lir aser parnok rongnung 99%-i govt. mapa dang aginür, anungji, ibai asen lokti asoshi tebilemtü tulu ka lir. Govt.-i item tazünger ajak nem mapa magütsütettsü. Parnok aika mapang tajung ajak tetidang balala asoshi renemdang intokmar, ajangla iba tensa nung asenoki kechi inyaktüla ta asübaji asen jakdang tasüngdangba tulu lir, ta

pai metetdaktsü.

Tanü Nagaland azüngzüluba (literacy rate) ji reprangdangra, 90% dak tema angur. Saka asen lima industries kecha mali, asenok indang rongsenketzüngji service sector nung dang lir. Anungji, tangar ama asenoka rongsenketzüng tejakleni onüra asen lokti aser lima den apet sentong tajung yanglua inyaktüla, aji mesüra asenok ya tamakoker state akümtsü, ta pai ashi. State ngur joko 60 dak tali arur saka tanü asen lima tiaji asenoki temetet dang, ta paisa tetishitsü kuli kar bener arua ashi.

(Maneni tapak 2 nung...)

## Tanü Padma Bhushan Javed Akhtar-i Kohima semdangtsü



**Kohima, Metsüremi/March 20 (TYO):** Indian Performing Right Society (IPRS) ajanga Northeast India nung music right awareness tashi itshidakja iba telok nung mendenbuba, Padma Bhushan Javed Akhtar-i March 21, 2026 nü CEO Rakesh Nigam den külemi Kohima semdangtsü.

Iba mapang IPRS lenirtemi Nagaland Chief Minister, ketdangsur aser lenirtem ajurua music rights, licensing system framework tashi itshitsü aser region nung creator yaritsü atema jembishini akatsü.

Music copyright, licensing aser royalties dak sendakba nung awareness agütsütsü asoshi Nagaland sorkar den lungjemba ya tang mezüngbuba alitsü.

Iba mapang IPRS-i Kohima nung IP Hub ka amenoktsü, koba TaFMA-i yarir.

Iba hub ya kentener aser ken mejemer temi music copyright tajungba nung angatetba, parnok indang temeden aser metadata ketdangsuba aser IPRS services temelaba nung agitetba tsütsü

tajungba angateta aser yaritsü atema yanglu.

Iba yagi region nung kentener aser ken mejemer tem membership, work registration, royalty processes nung lenmang sayatsü.

Nagaland nung kentenba yimba tajung aser balala aliba asoshi kanga jangja meteta lir, kong tribal, regional aser independent artists, bands aser tekülem kidang kentener tajung jenti lir. Ajisüaka kentener aika IP infrastructure küboki maiter, anungji parnok indang ken ya online aser offline sapangtem nung atemdang parnok royalties shidak mangur. Anungji item asoshi awareness agüja yaritsü asoshi iba mera ya agir.

IP Hub semzükbaba den külemi IPRS-i Regional Centre of Excellence for Music and Performing Arts nung My Music My Rights indang workshop ka ayongzüksü, kong kentener, ken mejemer, kentener telok tem aser music professionals tem state tesem balala nungi

adenshitsu.

"Ken ya sadem-sadema arütsü alema, oshioben balala jembir aser kin balalai atener. Ajisüaka asenoki aiben item ke shirnoki mejem ta mebushir. Ken kaji ojang mesüra ola kisüng masü, yangji nisung ka shisatsü, mapang aser arishi tepiyong bendanga agütsüba lir. Ibaji angashira, aji tushitsüla," ta Javed Akhtar-i ashi.

Sorkari kodang iba ama inyakyim yaritsü meraoker, ibaji ajanga creators rights ka industry kisüng teblemtsü masü ta sayur. TaFMA aser Nagaland sorkari yimya tajung sayuba asoshi kanga pelar," ta pai ashi.

CEO, IPRS, Rakesh Nigamia, Nagaland sorkar den lungjemba ya creator rights ya sensaksemba alema anir aoba nung tongtipang mera ka lir, ta ashi.

Kohima nung TaFMA den lungjemer IP Hub amenokba ajanga creator tem parnok dak alang systems amshitetsü maongka agütsütsü, ta pai ashi.

## Kohima nung World Oral Health Day 2026 amung



**Dimapur, Metsüremi/March 20 (TYO):** Capital Convention Centre, Kohima nung 'A Happy Mouth is a Happy Life' omen kübok March 20, 2026 nü World Oral Health Day 2026 munga liasü.

Sentong akhumdong, Renabomo Odyuo, NCS, Additional Secretary, Health & Family Welfare Department ajanga jembidang, oral health junga anepaluba nung temulung agütsütsü atema awareness agüja World Oral Health Day ya alima tesem ajunga nung amunger, koba nisung temang anema alitsü asoshi nungdakba lir ta ashi.

Iba nukjidong tongtetsü asoshi nurburtemi shilem agitsü tongtipang lir, kong kibongtem, schools aser healthcare workers adentsüla aser tetsütem dak tali rangloksüla, shirnoki kibong ka anema alitsü asoshi tongtipang shilem agir aser pei tanurtem takum tepiyong anema alitsü asoshi tamendak dak tajung

yangertsür, ta pai ashi.

Nagaland Dental team-i 2025 küm National Awards ana anguba - 'Best Performer' Award in Small States on World Oral Health Day aser 'Special Recognition' for World No Tobacco Day - atema pai tenüngsang agüja liasü. Pai maneni tajungtiba nung inyaksü ajungshi aser oral health tajungba kumdahtsütsü nukjidong yur nisung timba awajemtsü ayongzüka liasü.

Dr. Sendimeren Aonok, Director (Health), Directorate of Health & Family Welfare (DH&FW), Kohima ajanga iba sentong nung jembidang state nung periodontal disease, dental caries aser oral cancer tali akumba indang lemsatapa liasü.

Dental surgeons tem oral health indang kibur ama lir, aser patient nem shisatsü agütsüba aser moko amshiba dak sendakba nung awareness agütsütsü asoshi tongtipang teinyaksü lir, ta pai ashi.

Department-i state nung

Dental Health Units ajunga phase lemsar upgrade sütar aser dental chair & unit, light cure machines, scalars with RVG (digital X-ray), computer sets, laptops amala modern equipments tem amenoker, ta pai metetdaksü. Paise tanur tila asü dang oral hygiene yimta tajung angazükdaksütsü tetsütem teinyaksü lir ta ashi.

Iba sentong nung Dr. Reyosalu Lase, Addl. Director (Dental), DH&FW menden liasü aser Dr. I. Arenla Walling, Director (Dental), DH&FW ajanga pela agizükba o jembir.

Dr. N. Moangamba Jamir, Jt. Director (Dental) & SNO (NOHP) ajanga iba anogomung ratet ashi aser Dr. I Simon Sumi, Dy. Director (Dental) & SNO (NTCP) ajanga melepzüng o jembir sentong tembang. Iba sülen Dr. Thungbeni Ngullie, Sr. Resident (NIMSR) shisalen sayur ama "Mothers role on importance of Oral Health & Overview of Oral Cancer" nuk nung training agüja liasü.

## Nagaland Angh-i Id-ul-Fitr benjong salem lemsatep

**Dimapur, Metsüremi/March 20 (TYO):** Temeshi ita Ramadan tembanga iba temoatsü benjong Id-ul-Fitr ya amunger. Ibai dangar dang temeim sayuba, telungjem aser mapa tajung inyakba tanüla benjongba lir, koba ajanga nüburtem sendakteper. Iba benjongmung ajanga asenok ajaki yimjung, tesunep aser akumtsübotepba yimyatem

wazüka amshitsü ajungmesotsü imlar, ta Nagaland Angh Nand Kishore Yadav-i sangdong ka nung ashi.

Id-ul-Fitr ajanga kibong ajunga dangi tepela, yimchiyimjung aser anema aliba temoatsütem bener arutsütsü aser kin ajunga tsüngta temeim tesendaktep tali akangshijang ta moatsür, ta sangdong ajangasa ashi.

## NSAP beneficiaries Aadhaar aser Bank account sendakteptsü tuyur

**Dimapur, Metsüremi/March 20 (TYO):** Sorkari tesüsa February 25, 2026 nü totuyuba ka agütsüba nung shia aliba ama pension benefit agitsü asoshi National Social Assistance Programme (NSAP) kübok Old Age, Widow aser Disability Pension agir ajunga indang Aadhaar number aser Account number sendakteptsüla, ta District

Welfare Officer, Mokokchung, Mangliyanga-iba sangdong ka nung metetdaksü.

Anungji tang tashi Bank account den Aadhaar number mesendaktepi alirtem dang timtem majurui teyari angutsü atema tekeraba nung nungdakba mera agitsü metetdaksür, ta sangdong ajangasa ashi.

## ANPSA Mokokchung Unit...

(TAPAK 1 NUNGI..)



Tetushi tesemdang aser onuk jembir Pheluopfhelie Kesiezie-i ANPSA Mokokchung Unit silver jubilee nungo kaket sayatsudang tangokba noksa angur.

Tanü Nagaland Govt.-i wawa-menüba tsütsü (entertainment) nung dang rongsen aika intoker, saka iba tsütsü lanur sempet aketer kar dak alaka aikadi maongka mengutetsü. Iba ama tensa ka nung education jenjang ajungkettsü atema lenmangji kanga temesü lir, ta pai ashi.

Tanü Nagaland nung lanur zünger alirtemji arts azünger teimba, arts azüngba nung mapa angutsü lenmangji temesü, anungji, science, mathematics, technology aser technical education tsütsü khen temulung agütsütsüla, kechiyong rongsenketzüng renloksübajji yangji tuluka sentaka lir, ta pai tanga linük nung atalokba indang kar metemdanga lemsatep. Tanü alimai nungdakba angateta azüngtsübajji kanga tongtibang lir, ta paise shisem.

Asen lima rongsenketzüng renloksü asoshi education yayim (system) dak tulu ka keta lir, anungji, asen lokti aser asen state nung teblemtsü ajurubatem dak rangloker item teblemtsü ajema kümdaksütsü aser iba nungji yaritettsüsa education sentong tajung nungdakba ajiteter, yamaji kodang inyakdir, education tajungtibajji itemji asütsü, ta paise shisem. Saka hornbill aser mini hornbill ayongba jagi asen lima aser asen lokti teblemtsütem

kodanga majemtsü, ta paise metetdaksü.

Nagaland govt. budget reprangdangra 100% nung 60% dak tali itasen agütsüba nung aor, 30% shi sentong maliba nung intoker aser terenlok atemabo 10% shi dang anünger aser ibaji MLA 60 tsüngta rakteper, ta paise tanü Nagaland tia indang kar lemsatep.

Education tajungtiba atemaji tang National Education Policy 2020 ya-a ka lir. Kechiyong iba ya tejakleni aoba linüktem nungi apuzüka bener aruba inyakyimka lir. Tazüngtsü kaket ajema aser skill tsütsü temulung agütsüba, aser alima osangtsüsang metetba nung masü saka pei sasa yangerteta aoba (creative) jenjangi tugutsübajji kanga tenüngdaksü lir, ta pai ashi. Iba den education tajungtiba atemaji sentong tajung den govt. inyakyimtemjia melenshitsu nungdaker, ta paise metetdaksü.

Tetushi tesemdangrisa silver jubilee nungtem adokba nungo kaket ka sayatsü. Sentong nung EAC Kewimesin NCS, Mokokchung DEO Sentinenla aser ano tongtibang nisung kari shilem balala agi. Tang aser tesüiba mapang ANPSA Mokokchung Unit tenzükertem den ano lokti tentet balala nungi tejaokertem arua adenba ajanga iba sentong tali meraketdaksü.



March 20, 2026 nü New Delhi nung Ato kilonser Narendra Modi aser Delhi LG, Taranjit Singh Sandhu na senden amendang tangokba noksa nung angur.

### Riyadh, Saudi Arabia nung ano India nunger ka süogo

New Delhi, Metsüremi/ March 20 (Agencies): Tang Middle East nung raraba mapang nung Riyadh, Saudi Arabia nung ano India nunger ka süogo; iba rara nung tang tashi nung India nunger trok süogo, ta ketdangsertemi metetdaksü.

Saudi Arabia nung aliba Indian Embassy-i X ajanga, ketdangsertemi takoksa angur India nunger kibong züngsemtem den tongtepratepdar aser akokba tashi yaritepdar, ta metetdaksü.

March 18 (Bodhbarnü) Saudi Arabia-i Riyadh nung ballistic missiles aika nokdangteta liasü aser tejaksa

kar yimti nung aliba refinery ka anasa tsüka liasü, iba mapang nungji misslies tejaksa jagi India nungbaji tepset asütsüa akok ta bilemer.

Israel-i Iran kübok South Pars gasfield amakba sülen Iran-i Saudi Arabia amak.

February 28 nü Middle East nung rara tenzüka sülen Iran-i Saudi Arabia densema Gulf nung aliba linük aika maakogo, ajisüaka Saudi Arabia-ibo item missiles aika nokdangtetogo.

Gulf nung aliba linüktem aika nung India nunger nütsüng aika lir. Item linük nung India nunger aika kisüjensüba mapa inyakertem, healthcare, hospitality aser finance sectors

nung inyakertem lir; iba dak alia kaketshirtema aika lir.

Middle East nung rara adokba sülen tang tashi nung India nunger trok tepsetogo.

March 14 nüa India nunger ana Sohar, Oman nung asü. Hopta ka tejaklen Al Kharj, Saudi Arabia nunga India nunger ka asü.

Additional secretary (Gulf) Aseem Mahajan-i, "India nunger trok süogo aser ka samaogo. Saudi Arabia, Oman, Iraq aser UAE nung aliba Indian Missions-i India nunger ka samaba dak sendakba nung ketdangsertem den tongtepratepa inyakdar," ta metetdaksü.

### TMC-i Bengal election atema manifesto saya

New Delhi, March 20 (Agencies): Hokolbarnü West Bengal Chief Minister Mamata Banerjee-i West Bengal assembly election atema Trinamool Congress (TMC) party indang manifesto sayaogo.

West Bengal nung assembly election shilem ana lemsar April 23 aser April 29 anogotem nung agitsü aser May 4 nü vote azüngtsü.

Trinamool Congress-i state nung tetsürtem nem Lakshmir

Bhandar scheme kübok ita shia senotsü teyari tutsür agütsütsü; general categories kübok tetsürtem nem ita shia sen 1,500 aser reserved categories kübok tetsürtem nem ita shia sen 1,700 agütsütsü.

TMC manifesto nungsa secondary examination pass asüba lanurtem (arrshi küm 21-40) nem mapa mangu tashi ita shia sen 1,500 agütsütsü.

Trinamool Congress-isa West Bengal nung kibong shia nem ki sütsütsü aser

aluyimertem aser pei li maliba aluyimertem atema budget nung sen crore 30,000 lemezüktsütsü.

Manifesto nungsa district tasen tenet tentetsütsü aser urban local bodies teimba kümtsütsü nangzük aser teintet sensotem nem methitemi pension agütsütsü nangzük.

TMC-isa state nung kibong shia nem luli ajanga tzü agütsütsü aser World Trade Centre ka amenoktsütsü nangzük.



Shimla, March 20, 2026: Hokolbarnü Shimla nung Himachal Pradesh Chief Minister, Sukhvinder Singh Sukhu (abelen nungi tanabuba) Budget senden nung adentsü atema state assembly tonga arudang tangokba noksa nung angur.

**DEBTS RECOVERY TRIBUNAL, GUWAHATI**  
 Suwarna Bhawan, House No. 12, New Town Path, G. S. Road,  
 Near Hanuman Mandir, G S Road Ulubari, Guwahati-781007  
 Drpc No. 200/2024 Arising Out of O.A. No. 38 Of 2020  
 IN THE MATTER OF  
**STATE BANK OF INDIA**  
 - Vs -  
**M/S M K PLASTIC AND OTHERS**

Tsünglanglen shia aliba kiojentem ya shia aliba anogo, mapang aser tesem nung public auction asütsü; iba ya tekalen shia aliba sentsüh magütsüeterem nungi sentsüh alangzüksü atema lir, auction telatetbatem yamai alitsü:

- Kiojenji reserved prices **Rs. 77,86,171.00/- (Rupees Seventy Seven Lakh Eighty Six Thousand One Hundred Seventy One only)** dang ishiba agi mayoktsü.
- Tsünglanglen shia aliba kiojenji tsünglanglen shia aliri **May 8, 2026 anogo nung 15:00** ako nungi (nikongdang 03:00) 16:00 ako (nikongdang 4:00 ako) tsungda e-auction asütsü aser sale metembang tashi minute pongungu (5) atsülangtsü, iba sale ya e-auction platform <http://drt.auctiontiger.net> of the e-auction service provider M/s. E-Procurement Technologies Pvt. Ltd ajanga ayoktsü, "Kong aliar yamaji", "Koma aliar yamaji", aser "Yangji aliba ajak" basis nung ayoktsü. Bid asütsüperitemi yangi tongteprateptsü akok, Contact Nos: 9265562818/9265562821/6352634834 of M/S e-Procurement Technologies Pvt. Ltd. (Auction tiger), Head Office: B-7705, Wall Street II, Opp. Orient Club, Near Gujrat College, Ellis Bridge, Ahmedabad -380 006 Gujrat (India). E- Mail: support@auctiontiger.net & ramprasad@auctiontiger.net.
- Alizüksü tebilemba alirtemi earnest money deposit **Rs. 7,79,000.00/- (Rupees Seven Lakh Seventy Nine Thousand only)** asütsüla, aser ibaji Demand Draft / Pay Order / NEFT / RTGS nung "Recovery Officer, DRT Guwahati, A/C No.0568050012591", IFSC Code: PUNB0056820, Punjab National Bank (Erstwhile United Bank of India) , Shilpukhuri Branch, Guwahati, Assam nung May 4, 2026 anogo nung nikongdang 4:00 ako tashi nungbo deposit asütsüla.
- Bid asür takok angur indang deposit ji 'adjust' asütsü mesüra iba sale tembangba sülen mapa inyakba anogo asem tsungda e-payment ajanga 'refund' sütsütsü.
- Bid asür takokeri sale proceeds shilem 25 ji idangyongjisa Demand Draft / Pay Order / NEFT / RTGS ajanga "Recovery Officer, DRT Guwahati, A/C No.0568050012591", IFSC Code: PUNB0056820, in Punjab National Bank (Erstwhile United Bank of India), Shilpukhuri Branch, Guwahati, Assam nung DEMAND DRAFT/ EFT/NEFT/RTGS in favour of "Recovery Officer, DRT Guwahati, A/C No.0568050012591" ajanga deposit asütsüla, aser iba ama deposit ji 'default' süra kiojenji ano tanaben ayoktsü.
- Talizükeri sale proceeds nungi tanungba shilem 75 ji auction sale asüba anogo nungi tenzüka anogo 15 (terpungo) tsungda agütsütsüla.
- Tekalen shia aliba dak alia total sale consideration money (plus Rs. 10) nungi poundage fee @ 1 % ji DD ajanga Recovery Officer, DRT Guwahati nem deposit asütsüla.
- Higher bid agizüksü atema Recovery Officer, DRT, Guwahati nungi temelaba nungdaksü.
- Jelia osang memeteldaksü tsünglanglen sign sua aliri melungba ama auction anogoji atsülangtsü akok.

**KIOJEN OSANG TEJANGJA**  
 1) i.e. A plot of land measuring 01 Bigha 00 Katha 00 Lecha standing in the name of the Defendant No. 2 and covered by Patta No. 95, under Dag No.2/100, Mouza No. 3, Block-Chekiye situated at Chekiye village, Dimapur, Nagaland-797112 and is bounded and butted by North-Land of Hoshito Aye; South-Land of Hoshito Aye; East-Colony Road; West-Land of Hoshito Aye, as mentioned in the Schedule-B of the O.A.  
 Reserved Price: **Rs. 77,86,171.00/-** Earnest Money Deposit: **Rs. 7,79,000.00/-**  
 Auction Anogo: **May 8, 2026** Auction mapang: nikongdang **04.00** ako  
 Bid Increment: **30,000.00/-** or in multiple thereof.  
 Osang tejangja melettsü atema tsünglanglen sign sua lir mesüra State Bank of India den tongtepratepang.  
 Tsünglanglen kü meyongnem aser seal March 2, 2026 anogo nung Guwahati nung agütsü.  
**Recovery Officer I**  
**Debts Recovery Tribunal, Guwahati- 7**

**TENÜNGSANG AGÜTSÜR**

Ozü Imtilepden Imchen Chirnur aser Semchisemnur Telongjem ajanga **Dr. Michael Imti Imchen**, Deputy Director, Veterinary Hospital Dimapur, pai Governor's Gold Metal & Commendation Certificate ngutetba atema pa nem tenüngsang tetushi agütsüba sangdonger. Asen Teyanglur Tsüngremi pa taküm aser mapa tajung maneni moajang ta sarasademtsür.

*Kinungertem tenüng nung,*  
**- Dr. T.Temsu Imti.**

### India-i Afghanistan nem medical teyari touzük ton 2.5 agütsü



New Delhi, March 20 (Agencies): Pakistan-i Afghanistan yimtiba, Kabul nung aliba drug rehabilitation center ka amakba sülen Hokolbarnü India-i Afghanistan nem medical teyari touzük ton 2.5 agütsüogo.

March 16, 2026 nü Pakistan-i anünglen nung Afghanistan yimtiba, Kabul amakba tatalokba nung nisung 400 dak tali asü.

External affairs ministry-i, Afghanistan dangi rong ajanga bener yokba teyari rongnung mozü aser medical oset tapu aika densema lir; talisa iba lendong nung yirua alirtem yaritsü nükjidong nung India-i medical teyari agütsü, ta metetdaksü.

Hokolbarnü MEA-i sangdong ka ajanga, "India-i Afghanistan nungertem den teyashi lemsateper, aser tang ama tensa mapang ka nung

India-i maneni akokba tashi teyari balala agütsütsü," ta metetdaksü.  
 Hombar aonung 9:00 ako meta Pakistan-i drug rehabilitation hospital amakba tatalokba nungji yipten 2,000 dak tali aliba hospital complex shilem tulubaka raksatsüogo.  
 Afghanistan nung tongti ketdangsertemi ashiba agi, iba tatalokba nung nisung 400 shi asü aser nisung 250 jungnüa yiruogo.  
 Aonung 9:00 ako meta anünglen nungi amakba olaji tuluka angashia liasü aser Shahr-e-Naw aser Wazir Akbar Khan district nungia mokozü ngua liasü.  
 Pakistan aser Afghanistan na arrtsülen tensa tamajungba akümba mapang ka nung ya atalokogo. Taliban sorkari jenokdaksüba kiralongrartemi Pakistan amak, ta tai tonglokja Pakistan-i anünglen nungi Afghanistan amaker.



## TIR YIMYIM YIMOBILEM (EDITRIAL)

DIMAPUR SATURDAY, FEBRUARY (METSUREMI) 21, 2026

### Election timi magitetsü nuu ?

**T**angar anüdok aser anüolen alir kintem adoksatsübo ano talangka lir, saka asen Aotsür Aortema Naga nunger rongnungbo tazüng-temeteter aser süng long masü saka süng long yanglusang Kibuba Tsüngrem külemtsü mezüng angateta shisa tenük lapokba kinji asenok lir. Iba jagi asenoki Tsüngrem mapaa mulungsua tululu inyakteter aser nisungtem danga aremzüker aser temeim sayur. Ibaji bilemdangdang, asenok Aotsür Aortemi election ya timi magitetsü na (?) ta temulung kanga tipmedemi bilemer. Atangji, asenok asoshi election timi agitsüba ya tasak asütsüa akok, kechiyong asenoki makok maremer, anungji kechisüdirsüaka akoktsü atema tiyazü jembir, sübokrem amshir aser sübokrem agi mekokra tashiyim amshir aser tashiyim agi meshitak mapatem ajak shitak amai kuma inyaker joko mapang talangka arur. Iba ama tim masüba sobaliba nung asenok yimya sübadoker, iba nung jagi pilatsübaji asenok asoshi mapa kanga tasak kumogo. Ajisüaka, tanü putu nung alir Aotsür-Aortem asoshi tim masüba, ochimashi aser tashiyim amshiba mapatem toktsütsübaji tamakoktsübo masü, kechiyong iba mapaji akhi tsürabur putu nung limapur yimsüyimpong toktsüba dang nungibo kanga agia temelaba mapa ka lir. Iba ama tim masüba mapatem agi tim mapa kuma inyakba aser ochimashi mapa agi ochi mapa ama kuma inyakba mapatem ya melenshitsü asoshi asenoki shitakba takok tetezü ya angatetsüla. Aji oda, asenoki angatetsüba tongtibang kaji, mashilen nungi anguba takokji takok masü saka tamakoktem rongnunga tamakok tulutiba lir. Tatishitsü agi, kaketshisatsü bushiba mapang tatidang nung ajizüka zülur takok angubaji takok masü saka taküm nung ochishia alitsüba tongpang nung anguba tamakok tulutibaji aji asütsü. Ibaji taila takok, anungji taila takokji bener pei lima aser nübortem tenzüka mapa nung takoksa tulu adokdaksütsü. Kasaji, election nung ochimashi aser tashiyim agi akokba takokjia shitakba nungbo ochiba yimten tongpang nung tamakok anguba taila takok ka lir. Iba jagi alima nung tesünep masü petsaperong adokdaksütsü, nübortem lungjemdaksütsü melen telemsa adokdaksütsü aser alima renlok daksütsü melen rajang kümdaksütsü. Atangji, item tatalokbatem ya yangi rasaa ashitsü menügdaker, kechiyong asenoki anogo shia item tatalokbatem ajangshir. Aji oda, asenoki ochimashi aser tashiyim metsü prok nung nung kodaser asen lima nung ochishiba süngjang atangtsü ? Iba ama tangatetba agüja, meshitak mapatem aser ochimashi sobalibatem endoker, ano khen, asentenshia yimten election mapatem shitak kuma ochiba nung election agitsü asoshi, talisa, arogotemia anir "Clean Election" sentong tenzüka inyakba asenoki ajangshir. Aji oda, asenoki mapa agi mesayutetaka, iba 'Clean Election' sentong yagi nübortem mulungjang nung tangatetba agüja jembidar asütsü imlar. Atangji, Clean Election sentong yagi Election tashiyim agi agia aliba tashiyim agibo manendaksütettsü, kechiyong Clean Election mapa ya tangatetba agi tashiyim mapa akoktsü merangba sentong ka lir. Ashiko, asenok karibo Clean Election sentong ajanga tashiyim amshia tashiyim mapa anendaksütsü amai bilema alitsüa akok, saka kodaser tashiyim mapa ka tashiyim agi anendaksütettsü ? Aji oda, tashiyim mapa anema tashiyim amshia rarara, tashiyimang ana akümtsü. Iba tangatetba nung, tang ama asen lima nung election agitsüba mapang ya arogo aser lokti tentetemi maneni 'Clean Election' sentong ayonga akatsüla aser yimten yimsüsürtem shimtetba mapa nung Shitak o Meshitak na, Ochi o Ochimashi na, Tashiyim o Tangatetba na bendangteta sayutsüla. Yi aser moko lartem dang item machimechiyongtsütemji endokang ta aser auertem dang tauya ta ajungshi nung, tangatetbo angatet saka yimya mejungi sübaa alinungji meindoktet ama, Election timi agitsü ajungshiyonga magitetsüa akok, saka aji mangatetba agi masü angateter ser nung mejungi yimya sübaba agi mapa mekümteterba dang lir. Ajisüaka, asenoki yakta Election ya timi agitetsü aser shitakba takokertemi asen lima ochi aser tajungleni anitsü.

## OLEMSABANG

### WORLD ORAL HEALTH DAY

- Dr. N.MOANGANGBA JAMIR, Jt. Director (Dental)& SNO-NOHP  
Directorate of Health and Family Welfare

(Yashi adok nungi...)

Anungji tanur ka kum ana jungerbo Doctor dangi anir oa reprangdakjang, aser anogo nung aounung yipteni maidang ken aser anepdang chiyunger ken ta anaben taintemi anepalua tebu meyutsü yimya sübadaksüra pa/la tain akümdang Tebang/tebu tashidak tem nungi jenbua litettsü. Tanü putu tetoktepa (Competition) palala oda Central Institutiontem nung azüngtsü atema Dental Health Certificate nungdaker. Tanurji techira süaka mapang shidak nung anepalu mesui lira kechisarena atema lenmang mesüa akümtsü. Ano tepubo mesen agibo machi saka tepunü sendema lur tepu tsüngda tapok kuma chiyungtsü ajanger aser anojungi lokshishia aoba, koba dang Periodontitis ta ajar iba yagi Naga nunger Sali moko achir timbaka ola madok kangshidaki. Kodang tepunü nung posü jangtena talanga meshidoki yutsüdir ibaji lung (Calculus) amai kuma iba jagi lemalem tepuret (Periodontium) tashi mait akümtsü aser tepu anojungi loktokba dang masü tebang tashidak oda Cancer tashi kuma aotsü lenmang lapoktsür.

India ajunga nung World Oral Health Day ya National Oral Health Programme Ministry of Health & Family Welfare kübok, State ajak nung linük nubur ajak nüm temang anema alitsüba nung tebang aser tepu anepalubatsüba kanga dang tongtipang ta tangatetba agütsütsü aser koma, kong, koda anepalua teyari lenmang palala bushitsü iba indang inyakyim palala ajanga tesayuba agüja amonger.

Anungji iba osang kaket azüngertem den teküboklen agüja aliba tongtipang onüktem kar ajanga iba WOHD anogo tenung nung lesson kar lemsateper.

#### 1. Tepu meyuba ajanga temang nung tajangzük angubattem:-

- Tepu mesen ar-tsü nungi kümzüker (Dental Caries)
- Tepunü tashi itdaksür
- Bangshinüm madokdaksür
- Tepu tashi itdaksüba shilem koba dang Enamel ta ajar ya wazüka ayur.

Temetetsü ka-Tooth Brushji akok tashi tanük aser Flouride aliba Tooth Paste amshitsüla aser ita asem nung kenbosa Brushji melentsüla. Tanguba süngdang mashi ka bena arua tebu tushibaji yimya teprangtsü majungba dang masü iba jagi tepunü yiurdaksür aser komo tendaksür anungji Tooth Pick tesüsü amshia kendoktsüla, kokra Dental Floss amshibaji kanga tajungba. Iba den Doctor den Consult sür Mouth Wash amshiba agia tebangji semsasemsa lidaksür.

#### 2. Oral Health junga aliba ajanga temang nung tajangzüktem itemi angur

- Temolungjang, Tepokpok, aser shinü tashidaktem nungi kümzüka alir
- Chiyungtsü jangratema techinütsü tapu ajak chiyungteter aser Digestion nung yarir.
- Tepang, tepu, bangshinem aser tepunü tashidaktem nungi kümzüker.
- Anema aliba sempet tekolok, shisatsü, tesüngjem aser temolung pelaseta alir,
- Lokti aser sobaliba inyakyim palala nung sadoksadoka tasü ita shilem agiteter.
- Mapang aser rongsen jenti indoka Treatment agitsüba nungi kümzüker.


#### 3. Tepu anepalutsüba atema 2-2-2 formula ka bilemtetdaksünür

- Anogo nung tepu anaben Brush asütsü. (Aounung yipteni maidang aser anepdang Breakfast/Lunch sür kelen)
- Minute anabosa agia Brush asütsüla
- Kum nung anabenbosa Doctor den Consultation agitsüla.

Tepu treatment agidang mapang kanga agir iba denjiang Materials-tem jenjanga kanga dang tasak aser Health Insurance Scheme palala nunga iba ya densema mali (Often not covered by Health Insurance) anungji timtim madokdaksütsü peisasa kümdangtsü, aser memendang anepalutsüba ajak dang temelabaji lir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Texas nung kaketshir 500 dak temai Yisu Khrista agizük



**March 20, 2026:** US nung aliba college campus aika nung kaketshirtem meyirjang aika outreach sentongtem nung dena Tsüngrem külemba den külemi aikati Khrista agizüka baptiogo.

Tang tesüsa Texas nung aliba college campus nunga kaketshirtem aikati Khrista agizük aser Lone Star State nung aliba college aika nunga item sentong agia arudar.

Jay Lowder Harvest Ministries tentetsang, Jay Lowder-i Texas nung aliba Stephen F. Austin State University campus nung ayongzükba sentong ka nung kaketshir 500 dak temai Khrista agizükogo, ta metetdaksü.

Osangbener den jembidang Lowder-i, "Ni tesüiba küm 20 dak tali sayutsüngia arudar. College azüngertem ayimjemtsüji kanga tasak, aser aiben parnok pei jila nung malir. Kaketshir 500 dak temai

Khrista agizükogo," ta metetdaksü.

Abilene Christian University nung ayongzükba sentong nunga kaketshir 1,000 shi aden aser kaketshir 80-i Khrista nem taküm bendanga agütsü.

Lowder-i, "College azünger kaketshirtemi ochi bushir aser parnok kanga teladak. Tang kaketshirtem rongnung tebilemtsü tulu kaji mental health lir," ta ashi.

"Social media ajanga kaketshirtem aikati, parnoki mental health tsütsü timtem ajangshir ta ashir, aser karibo soseta asütsü bilemer ta ashir," ta pai metetdaksü.

Lowder-i, "Khrista osangtajung proktsüji sayutsüngir mongintem teinyaktsü mapa dang masü saka iba ya tamangertem ajak teinyaktsü mapa lir. College azünger kaketshirtemi campus nung külem medemsortem den Khrista

osangtajung lemsateptsü akok," ta ashi.

"College campus aika nung tamangertemi Khrista osangtajung lemsateptsü jangrar. Kaketshirtem aikati Kibuba atema tzürar, aser ibaji parnok medemertemi ajungshiba agi lir," ta Lowder-i metetdaksü.

"College campus tem nung Tsüngremi mapa inyakba ngua pelar. Kaketshirtemi Khrista agizükba sülen parnok maneni anepalutsü aser parnok nem counseling agütsütsüji kanga tongtibang," ta pai metetdaksü.

"Kodang nisung kati temenen nungi pilatsü aser Khrista dak amangtsü atema telemtetba agidir parnok nem counseling peria agütsütsüla. Nisung karibosa baptitsü atema parnok ajungshitsüla aser Arogo nung densema Lai O angatettsü atema tesayuba agütsütsüla," ta paisa shisem.

# Mission Australia-i Youth Survey 2026 tenzükogo

**March 20, 2026:** Mission Australia indang Youth Survey küm 25 ajungbamong nung parnoki arrshi küm 14 nungi 19 lanurtem dang 2026 survey nung shilem agitsü ayongzük.

Iba survey ya March 19 nü tenzükogo. Parnoki lanurtem dang iba survey nung shilem agia pei teimla, tangatetbatem aser tebilemtsü onüktem lemsateptsü ajungshir.

Yaküm lanur 17,000-i iba survey nung shilem agia liasü. Iba survey ajanga yamai bushiteta liasü-shilem 64-i Australia nung taküm alitsü jenjang kanga tasakba akümba lemsatep, shilem 29-i mental health atema tebilemtsü akaba lemsatep, shilem 27-i alima tzü-mopung menenba tebilemtsü lemsatep aser shilem 25-i kiojen makaba/ talidak makaba tebilemtsü

lemsatepa liasü.

Taküm iba survey nung tasüngdangba tasen aika asüngdangtsü, aser item rongnung 'Nü taküm jenjang tajungba akümtsü atema ner kiyong nung kechi temelenshi aginer?' tasüngdangba densema lir.

Mission Australia deputy chief executive officer Ben Carblis-i, lanurtem tangatetba metettsü atema Youth Survey ya kanga tongtibang, ta metetdaksü.

"Youth Survey ajanga küm 25 tashi tebilemba metettsü aser lemsateptsü atema Australia nung lanurtem nem maongka agüja arur," ta pai metetdaksü.

"Küm 25 tsüngda survey 500,000 renemogo. Fashion bo kanga melenshir, ajisüaka lanurtem telangzübabo memelenshir," ta pai ashi.

Tamalen Youth Survey tenzük dang iba survey nung tasüngdangbatem rongnung yi aser temesepba mozü, kibong nung mangatettep, school mesüra study nung timtem ajangshiba aser mental health dak s e n d a k b a t a s ü n g d a n g b a t e m densema liasü.

2010 küm agiba Youth Survey nung loktiliba nung tebilemtsü balala aser ajak kasa züngshiba densema tasüngdangba aika asüngdanga liasü.

Taküm agiba Youth Survey report ya taküm November ita nung sorkar, melungtet teloktem, schools aser nübur ajak den lemsateptsü.

Youth Survey 2026 ya March 19 nungi August 14 tashi agitsü. Iba survey nung shilem agitsü atema minute 20 shi dang agitsü.

# ANOGO ABEN TSÜNGREM DEN

## ALANGZÜKBA LAR

*Atangji pai asen toushi benlok, aser asen tejashi pai aben.... aser pa dak azükba agi asenok anepa lir. Isaia 53:4-5.*

Alima tatalokba otsü kodang reprangdangdir, 17th-18th Century nung Africa lima nungi shishirtemi nisung aika putena bener oa England, America lima nung alar jenti ayok. Kenü anogo Tsüngrem metetba nisung kadi par kidang alar asütsü asangur chanu ka sen talang agüja alizük. Alizükba mapang nungi iba alarsangji kanga shisabulua aküm. Kechiaser kibursangji kechi koma nisung ka pai memetet; Kechi koma reshikangshi ajurutsü memetet; item tebilemtsü jagi pa anisüngzük menguteti alidang, kibur jagi shiti ka nung yamai zülur agütsü..." Iba nisung ya ozü kidang alar ka lir; tanü nungi asen yimti nung pa senzüa alidang shiri pa ajurudir temeim mapa sayuang", yamaji zülur kiburi pa teka nung amokja ashi, Tanü nungi na talenba kecha maka ozü yimti nung jangratema liang; ta shia iba shiti agütsü. Iba shiti aser o angashia pa mulungjang nung tepela agi sünga pai kibur dak azüiter ashi, masü, ni na nungi maotsü, kechiaser nai ni sen talang agi ali ta shia pai kibur dakji azüiter ajeb.

Iba otsü mesüka asenok temenen lar küma temenen talenba nung alidang Yisui asen menen bena pa senti zü tokshia, pa dak zübu aketba ajanga asenok anep. Temeim adianutem, Khristai asen asoshi kechi inyak, iba temeim nungi asenok mepilai pa dak azüitdi.

### SARASADEM:

Kibuba Yisu, nai kü toushi benlok aser kü tejashi aben. Aser ne dak azükba agi ni anep. Ne temeim nungi ni mepilatsü kü nem tashi agüjangma. Amen.

# Tsüngrem mezüngmeshiba ken o nung tai tonglokja alir ka chiok

**March 20, 2026:** Pakistan nung Tsüngrem mezüngmeshiba ken o nung tai tonglokja alir Khristan ka court-i chiokogo.

Arrshi küm 62 Khristan, Shoukat Javed anema Muslim nunger kati ken o benoka liasü. Ajisüaka ken o benoksang jagi, pai Khristan dangji tai tokogo aser iba ken o agienner ta ashi, ta Javed atema ken o jembitsür lawyer-i metetdaksü.

Javed atema ken o jembitsür, Arooj Ayub-i, yaküm May 29 nü Muhammad Mushtaq Ahmed-i Attock District, Punjab Province nung Javed anema ken o benoka liasü, ta metetdaksü.

Ahmed-i, Javed-i ainkar Muhammad anema jembiogo, ta tai tongloktsüba sülen mapang tatsüka tsüngda police-i Javed apu; iba sülen hopta ana lir pa bail nung chioka liasü.

Osangbener den jembidang

Ayub-i, "Temesepba mozü dak sendakba ken o nung Javed nem tai tongloktsütsü merang, ajisüaka tamakok anguba sülen maneni pai Tsüngrem mezüngmeshiba ken o dak sendakba nung Javed nem tai tongloktsü," ta ashi.

Tesüsa March 6 nü kuli maliba nung ajemdaker ken o agientsü atema temeshiba ken o agütsü. Iba sülen ken o angadangba mapang nung Ahmed-i court dang, pai Javed dang tai tokogo aser iba ken o agiendaktsüner, ta metetdakja liasü.

Osangbener den jembidang Javed-i, "Khristan leper ka nung ni kü kija alir. Ni leperji anepalua repranger. Ahmed-i leper nung mapang shia jana indoker, aser ni ibaji ashishiba ajanga küna tsüngda mangatettep adoka liasü," ta metetdaksü.

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Wakset**

(v) tashidak agi temang waka asü ( died of swelling)  
\* Pai pa yiruba zübu junga anepalu masüba agi wakseta asü.

**Waküp**

(n) au lanu nükti teküp saladokba (bamboo sheath)  
\* Waküp amshia tanurtemi ki asü.

Walaksang

**OLONG PAITEP # 7450**

1						2				3
								4		
5		6				7				
8										9
								10		
					11	12				
		13								
14						15				
					16					

**TIPIEN**

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjiong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

**OLONG PAITEP # 7449 TELANGZÜBA**

**TIPIEN :**

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

**NAI-A YA METETTER**



Dr Sharda Ayurveda tenzüker Dr. Mukesh Sharda-i Guinness World Record ka yangluogo. March 8, 2026 International Women's Day nüngtem nung Kingsville Resort, Ludhiana nung sentong ka agidang Dr. Mukesh Sharda den Ayurvedic experts pungui India nung "largest Ayurveda lesson" agia liasü aser iba ajanga otsü tasen ka yangluogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Ibanez guitar-i Imnainla Jamir pusema nungiter**



**Kohima, March 20, 2026**

(TYO): India nungi mezüngbuba tetsür Ibanez Guitar endorsee ji Naga musician Imnainla Jamir lir.

Alima nung Ibanez guitar

brand ya kanga nüngtugu lir aser nisungtem kanga sapua amshir. Ibanez Guitar-i Imnainla züngokba ya lai guitarist aser performer ka ama shilem tajung agiba aser sempet aliba ajitetba

lir ta Task Force for Music & Arts (TaFMA), Nagaland-i metetdaksüogo.

Ibanez endorsee ka ama lai Ibanez guitars amshitsü aser alima nung nüngtugu musicians den külemi züngsemer.

Imnainla-i Hoshino Gakki (Ibanez Japan) aser Music Distribution Company (Mumbai) dang pelaba metetdaksüogo. Parnok ajanga iba naroküm ya lai ngutetogo ta ashi.

Imnainla-isa lar kibong, temeimertem TaFMA, Government of Nagaland ajanga la nungita aruba atema pelaba shisem.

"Ibanez kibong nung shilem ka asütsüba ya maongka tulu ka lir. Iba ajanga asen region nungi lanur musicians ajungmesotsü aser pei tejangraba dak rangloker merangtsü imlar" ta laisa metetdaksü.

Ibanez-i shimokba ya Imnainla Jamir atema dang masü saka India nung music atema tongtipang alizüng ka lir.

**Assam Election atema NDA seat sharing renemogo**

**Guwahati, March 20, 2026**

(Agencies): Assam Assembly elections agitsü mapang tonga arudang NDA-i tanemi dang seat-sharing plan ka renemogo. Osang angazükba agi tan elections nung BJP-i menden 89 nung tokteptsü.

April 9 nü züngsem 126 agi akümba assembly election atema NDA sasep nung olemtepa arur iba ya angatettepogo ta ashir.

Assembly constituency 126 nungi BJP-i menden 89 shi nung tokteptsü. Assam nung sorkar akümtsü atema majority mark ji menden 64 lir.

NDA den yariteper Asom

Gana Parishad (AGP)-i menden 26 nung aser Bodoland People's Front (BPF)-i menden 11 nung tokteptsü akok.

Chief Minister Himanta Biswa Sarma-ia olemtep tatemleni arudar ta ashi aser iba ajanga NDA-i election nung longjemer tokteptsü tebilemba sayur.

Assam nung Congress lennir tejen anati BJP nung denogo. Assam MP Pradyut Bordoloi aser APCC vice-president Nabajyoti Talukdar nati Congress toktsür BJP nung aden. Tena dak alia kümtem süia arudang Congress lennir tejen aikati

BJP nung züngsem kümogo aser iba ajanga election nung Congress asoshi tetsükdaksü bentsür arua lir.

2021 assembly elections nung BJP-i menden teimba nung toktepa liasü. Iba election nung NDA-i menden 75 nung takok nguteta sorkar aküm. NDA nungi BJP-i menden 60 aser AGP-i 9 nung takok anguba ajanga sorkar melamela kümtepa liasü.

Assam nung menden lemsatepba ya kanga tongtipang lir aser talisa Bodoland ama regional party tashi itta aliba tesemtem nung kanga nüngdaker.

**Manipur nung AR amakba atema PLA züngsem 3 aitsür**

**Imphal, March 20, 2026**

(Agencies): National Investigation Agency (NIA)-i People's Liberation Army (PLA) züngsem asem anema chargesheet ka benokogo.

Yaküm Manipur nung Assam Rifles truck gari ka amakdang sepai ana tepsetba ken o atema chargesheet ya benok.

Par asem ya Thongram Sadananda Singh (Ngachik), Khudongbam Oji Meitei (Keilal) aser Irengbam Jugindra Meitei (Jugin Meitei) nunger lir aser parnok ajak ya Manipur nung alir. Par asem ya taoba mapang ozüng amertemi apu aser NIA Special Court, Imphal nung par asem anema chargesheet benok.

September 2025 nung Bishnupur kübok Nambol Sabal Leikai nung iba lendong ataloka liasü.

Iba anogo PLA-i 33 Assam Rifles truck gari ka amak. Iba

ya parnoki nübortem tsüngda kiralongratsü aser India sorkar anema rara menatsü asoshi inyakba liasü ta NIA-i ashi.

Iba anogo nung PLA züngsemtemi prangpong aser tapoktsütem bener Nambol Sabal Leikai crossing nung adenshi aser truck gari amak ta

bushisüngdang ajanga bushitetogo.

Iba lendong nung Assam Rifles personnel ana asü aser pungu kanga mejungi yirua liasü.

NIA-i northeastern region nung counter-terror operations nung shilem ka ama iba ken o maneni bushisüngdang südar.

**KONANG TETUSHI YIMYIM**

**Sb. Imlikokba Longkumer,**

**Wb. Meyimongba aser Wt. Moainla** tena

jabaso ajanga NPSC CTSE 2025 tatidang agiba nung Sub-Divisional Officer PHE Department nung menden tajung ajangzükttetba asoshi 2 Buba Medemsanger Sungpo Zunga (Chuchuyimlang) Mokokchung Unit ajanga tamasa Tsüngrem tenung asanger aser zungar nem meraket bener arutsuba asoshi tepela yimiyim sangdonger.

Ne sempet alimar wadang tenzukba nung tajungtiba agi maneni amshiang ni ta aji asen zungar tamang sarasadem.



Sd/- President

Sd/- General Secretary

# Iran indang IRGC odongtar Ali Naini tepsetogo



Ali Mohammad Naini

**Tehran, Metsüremi/March 20 (Agencies):** United States aser Israel shilem agia tang raraba nung tayimtsü amshia amakdang Iran indang Islamic Revolutionary Guard Corps (IRGC) odongtar Ali Mohammad Naini tepsetogo, ta Iranian state media ajanga ashi.

Islamic Revolutionary Guard Corps ya Iranian Armed Forces indang multi-service primary force ka lir.

Naini ya American-Zionist temi tasü mait kiralongra mapa tamajung inyakdang anepbong

nung tepset, ta Guard ajanga par Sepah News Website nung ashi.

Pai Us aser Israel anema o jembir ghonda ishika lir pa asüba angashir. Fars news agency ajanga ashiba agi, "Ozü missile industry ya 'perfect score' angutsü temsüa lir... aser iba atema tebilemstü kecha mali, kechiaser rara mapanga onoki maneni missile yanglur," ta Naini-i shia liasü.

Ibai tan hopta Iran sorkar mitkar lenirtem asoshi takoksa tulu pezü buba alitsü. Anogo ishika tsüngta Iran ketdangsür

Ali Larijani, Gholamreza Soleimani aser Intelligence Minister Esmaeil Khatib nungera tepsetogo.

Iran aser Israel tsüngta rana nung United States densema kanga sashia kumogo aser anatsülen mitkar aser energy nung tenük yoker amaker. Hopta tsüngta ang Israel-i Iran indang South Pars gas field amak, koba alima nung natural gas reservoir tulutiba lir, aser iba yongji Iran-ia tayang kepzüka Gulf energy infrastructure nung missiles khalokja region nung tensa tamajungba akum aser alima nung energy jenjang timba kumdaktsü.

Iba rara tenzüker Hokulbarnü anogo 21 jungogo aser military operations manener aser tsükchitep tuluba akumer.

Israel-i Tehran lenirtem dak tenük yokba campaign nung shilem ka ama tayimtsü amshia amakdang Iran indang Intelligence Minister Esmaeil Khatib tepsetba sülen Bresthostibarnü Israel Defence Minister Israel Katz-i taoksatsü tali agütsütsü nangzüka lir.

# Iran-i ano Kuwait refinery amak



**Kuwait City, Metsüremi/March 20 (Agencies):** Iran-i ano drone amshia Kuwait indang Mina Al-Ahmadi refinery nung Hokulbarnü amakba sülen firefighter temi mi remseptsü meranger, koba tan hopta iba tesem nung tanaben amaker alitsü.

Iran nunger million aika Persian New Year (Nowruz ta ajar) amungba mapang ka nung Gulf energy infrastructure nungya amaker.

Kuwait ketdangsürtemi drone kati amakba sülen refinery nung mi adok, ta ashi aser region nung tongtipang totzü atsüba tesemtem amakba tebilemstü tali akumer. Alima nung tongtipangtiba gas export centres tem rongnung ka ta

züngshiba Qatar indang Ras Laffan LNG hub nung maker anogo ka lir tang iba tesem nung amak.

Hopta tetenzüklen Israel-i alima nung natural gas reserve tulutiba aser Iran indang domestic energy supply tongtipangtiba South Pars gas field amakba ajanga Tehran-i tayang kepzüksü nangzüker lia tang tesem balala amakba angazüker.

Tayang kepzüktepa energy infrastructure nung tali maktepba ajanga alima nung totzü aser gas supply timtem ajurua aliba atsülangtsü ta tetsübo aitdaktsür aser markets tem tia mejangjai akumer.


Tensa tamajungba kumaka Israel Ato Kilonser Benjamin Netanyahu-i iba rara tatemleni

arur amai ashir. "Onoki akoker aser Iran samatsüogo," ta pai ashi aser rara ya nüburtemi bilemba dang nungi tekeraba nung tembangtsü akok ta ashi aser Iran yimden laodaktsütsü asoshi ground operations tenzüksü ama metetdaktsü.

Ajisüaka Iran tang tashi tekong meranga lir. Islamic Revolutionary Guard Corps odongtar Ali Mohammad Naini-ibo hopta aika bomb poklokjaka linük indang missile programme shidak lir ta ashi.

Energy infrastructure nung tali tenük yoktepa aser anatsülen nungi atsüanem akatsü yimya mesayur, anungji iba rara yagi alima nung energy tsütsü timtem talangka alitsü ta tebilemstü tali akumer.

# MULUNGNEN O



24.02.1936 to 16.03.2026

Yisui ashi, "Shibai kü dak amangdir, pa süaka taküm alitsü" - Yohan 11:25

Onoki teti meima aliba asür **Wb. V. Panger Longkumer** shirangdang aser iba alima toktsür aodang, pa meimertem, kiyonger, medemer aser kinüngertemi nübu, rongsen aser sarasadem agi nungita yariba atema kanga pelar. Nenok arua asükhu lemsatepba ajanga, ozü nuktzü aidoktsü aser anisungzük agütsü.

Nenok temeim mapa teti onoki bilemtetsü. Tsüngremi nenok ajak moajangma.

~ Temeim Kinungtsü, Chirnurtem aser Semchirtem.

# MULUNGNEN O



Aso: 16th December 1939

Asü: 11th March 2026

Onoki teti meimla ojala **Meratula Jamir** (W/o Lt. Senkameren Ozüküm) shirang yipden nung alidang nungi la akümli tembangba anogo tashi, kinunger, medemer, kiyong-kinar, yimer-yimsanger aser lokti balala shirnokisa ozü asüku mapang nübu, rongsen, sarasadem agi yaritepa meimogo, nenok ajak dang kangasa pelar. Tsüngdong arua meshitet nung iba sabang ajanga nenok ajak dang mamatetba tepela lemsateper. Takar Tsüngremi nenok temeim mapa tajung asoshi talubusa moatsütsü onok tamang sarasadem.

~ Temeim chirnur, semchir & kinungertem

# MULUNGNEN O




IMKONGREMLA (MEKÜL)  
ASO: 1929 - ASÜ: 10-03-2026

Onoki teti meima aliba Asür Imkongremla akumliir wadang tembanger onok mangyim-jashi tia nung alidang onok den yariteper ajak dang kanga pelaba lemsateper. Nenok sarasadem, mapang, nübu aser rongsen teyari agi onok tashi itdaktsü aser anisungzük angu. Nenok kija shia dang ozüi pelar ta meshitetba atema sasa bilemer, saka nenok ajanga dang kanga pelar. Tulusang Tsüngremi nenok ajak moajangma.

~ Temeim kinungertem.

## Magda Linette-i round tanabuba nung Iga Swiatek tsükdaktsü



**Miami, Metsüremi/March 20 (Agencies):** Brehostibarnü Miami Open tennis asayamung round tanabuba nungi Iga Swiatek tsükdakja 50 buba rank nung aliba külem Polish tsür Magda Linette-i 1-6, 7-5, 6-3 agi Grand Slam champion trokben bena alila madak takok angu.

Tang Wimbledon champion bena alila Swiatek, shibai 2022 küm Miami Open akok, lai 2021 WTA Finals sülen asayamung nungi kera tsükbabo tang mezüngbuba alitsü.

Iba tamakok ya Swiatek asoshi tawa tejashitsüka Australian Open quarter-finals aser Doha nung WTA 1000 aser Indian Wells nungi tsükba nung bendenloksema alitsü.

Swiatek ya Miami nung ATP aser WTA hardcourt tournament meyoktepba nung jenjang tanabuba nung liasü, saka Indian Wells finalist Elena Rybakina-i Aryna Sabalenka sülen tanabuba jenjang atongba sülen la tasembuba jenjangi aluogo.

Swiatek-i mezüng set ya minutes 33 nung agia liasü. Ajisüaka Linette-i asendenshir asayaba nung tajangzük liasü.

"Ni tera tali asayatsüsa akum. La nem anisüngzük magütsütsü mechi ni tera tekeraba nung azüksüsa akum. Saka item ajak ya service tajungba nungi tenzük," ta Linette-i Tennis Channel dang ashi.

Swiatek ya ayong-ayonga akokba masü, kechiaser set tasembuba indang game ti buba nung lai match points ana tashi kumzük aser match point atema Linette-i serve asüba mapanga point ana soita ayu.

"La (Swiatek) ya break points down, match points down nung kanga junger. Ni serve nung tashi ita alitsüla ta ni meteta aru," ta Linette-i ashi.

Linette ya round tasembuba nung Philippines tsür arishi küm 20 tain Alexandra Eala den asayatsü. Eala-i Germany tsür Laura Siegemund madak 6-7 (6/

8), 6-3, 6-3 agi koka liasü.

"Ni tera agi dang akok," ta taoba küm ajungbena semi-final tongtetla Eala-i ashi. Lai ghonda asem ser minute 20 asayar Siegemund madak takok ngua liasü.

"Temang aser tekolok shisatsü ajak anibelega asayaogo," ta ashi.

Ibai rank 29 buba nung alila Eala asoshi WTA career match talangtiba alitsü. Lai taoba küm Miami Open quarter-finals nung Swiatek madak takok angu saka semi-finals nung America tsür Jessica Pegula-i tsükdaktsü.

Taoba mapang world number one nung alila arishi küm 45 tain Venus Williams ya iba asayamung mezüng round nung Britain tsür Francesca Jones-i 7-5, 7-5 agi tsükdaktsüogo. Tena ghonda ka ser minutes 51 asaya liasü. Jones ya round tanabuba nung seed pongu buba nung alias Pegula den asayatsü, shiba taoba küm Miami Open runner-up liasü.

## Ticket mali football asayadaki aoba temerenshi tulu alitsü

**London, Metsüremi/March 20 (Agencies):** England aser Wales nung ticket mali football match telungi aiba aibelen mapa tamajung inyakba ama ozüng tasenbai kumdaktsür, koba Deobarnü Wembley nung Arsenal aser Manchester City tsüngta Carabao Cup final asayatsü lia nungi amshitsü.

Aibelener tem küm pongu tashi football asayadaki meyoktsü aser senchi sen £1,000 tashi achitsü.

2021 küm July ita Wembley nung England aser Italy tsüngta European Championship final asayadang fans meyirijang aika stadium telungi nungpoka aiba sülen iba ozüng ya yanglu.

Iba ozüng tasenba ya 'tail-gating' azüoktsü mechi yanglu - kong supporters tem tickets mali sernung ticket bena alir sülen nungtepa stadium telungi aiter.

Ticket, passes aser accreditation documents taila

amshia mesüra staff züngsem ama metetsümonga telungi aitsü memelatsü.

Tang tashi ticket mali football asaya repranger aier tem asoshi temerenshi tejangja meliasü aser iba ama inyaker putetba temerenshi magütsüi nungteta yok.

Taoba küm Carabao Cup final dak sendakba nung nisung 69 apu, aser item ya timba ticket mali Wembley telungi aitsü merangba yong lir ta Metropolitan Police-i ashi.



Nagaland Sepaktakraw team-i state tenüng nung 28 buba Sub-Junior (U-14) National Championship nung shilem agitsü, koba Mega Sports Complex, Ranchi, Jharkhand nung March 23-27, 2026 anogotem asayatsü lir. Parnok iba asayamung nung shilem agitsü asoshi maodang Nagaland Sepaktakraw Association tir Ruokuo Kire den noksa ka tangokba yangi angur. Parok ya Senior Coach Hoshe Khrieo-i anir aor aser Department of Youth Resources and Sports, Govt. of Nagaland ajanga senotsü teyari agütsür.

## AFC-i 2031, 2035 Asian Cup bidding soita atar

**Metsüremi/March 20 (Agencies):** 2031 aser 2035 Asian Cups ayongzüktsü asoshi raktepba meimlai anena lir.

Alima nung football calendar melenshitsu mejangjaba yong asayamung anaprong indang bidding process soita atar, ta Asian Football Confederation (AFC) ajanga Hokulbarnü ashi.

FIFA den temelenshi ka alitsü asoshi sensaksema mechi iba telemteba ya agi, koba ajanga Asian Cup ya even-numbered years dangi meyiptsü akok.

"Premier national team competition sentong melenshiba ajanga timtem ajurutsü ta ajiteta AFC-i competitions calendar repranshimtsü tenzük," ta governing body ajanga sangdong ka nung ashi.

"Iba inyakim nung shilem ka ama, tali tejangjaba agütsütsü aser tarutsü nung host shimba tsütsü yimya tajungba amshitsü mechi tang bidding cycles anena atatsü temtsü ta ajitet."

Continent nung tejangraba tulu liaka iba telemteba ya agi. 2031 edition asoshi bids trok

agüja lir aser itemji Australia, India, Indonesia, Kuwait, South Korea aser Central Asia nungi Kyrgyzstan, Tajikistan aser Uzbekistan külemi alitsü.

2035 atema Australia, Kuwait aser South Korea den Japan lir.

Tang asoshi item sentong ajunga soita atar.

Asian Cup indang anogo shimba nung aiben melenshia arur.

1956 küm tenzükba sülen iba asayamung ya even-numbered years nung asaya aru aser danga tongtipang asayamung den majuruteptsü mechi 2007 nungi tenzük odd-year cycle nung asaya aru.

Ajisüaka January 2024 nung Qatar-i ayongzükba ajanga mapang atsüshiba sayur. COVID-19 tenokdangba mechi China ainshiba sülen Qatar-i iba asayamung ya ayongzük.

Taruba Asian Cup ya Saudi Arabia nung January 2027 nung asayatsü lir aser yangji Qatar ya defending champions ama asayatsü.

## Luka Modric-i AC Milan nem pa indang 2018 Ballon d'Or agütsü



**Milan, Metsüremi/March 20 (Agencies):** Croatia nunger midfield nung takotet asayar Luka Modric-i pa indang 2018 Ballon d'Or sempet ya khen atema AC Milan nem agütsüogo, anungji fans temi football nung tematiba kija sempet anasai oa reprangtsü maongka agütsür.

Iba trophy ya Casa Milan nung club indang museum nung sayutsü, kong Modric football asayaba benjonga special exhibit nung shilem ka ama ayutsü.

"Ni iba jersey asema anogo nungi, kü mulungjang nung khenyongi balaka tebilema aru, ni atema, iba club asoshi asayar ka asüba ya pongmang asangsang akumba lir," ta pai ashi.

"Asen fans den Ballon d'Or lemsatepba ya parnok nem langka meyipa agütsüba yimya

ka lir, shirnoki ni kanga jangratema bhukuma liasü. Forza Milan!"

Iba exhibit nungya Modric football asayaba mapang tangokba noksa aser pai jembiba o tem sayutsü, koba ajanga pa lanuwa mapang nungi Milan den sendaktepa aliba tali jangjatsür.

Modric-i 2018 Ballon d'Or anguba ya modern football history nung jangratemsü mapang ka liasü.

Pai taoba mapang külemi asayar Cristiano Ronaldo ajateta iba sempet angu aser küm ter dak tema Ronaldo aser Lionel Messi nati iba sempet melentepa ngua aruba pai raksatsü.

Iba küm pai anir Croatia ya FIFA World Cup final tashi asaya aser UEFA Champions League title asemen buba atongtema ajangzükba liasü.

## BILEMDANGANG

"Nai na akoktsü merangbaji rara tulutiba."